



DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ  
Orthodoxorum Medicorum Patrono.

QUÆSTIO MEDICO-CHIRURGICA;

QUOD LIBETARIIS DISPUTATIONIBUS  
*manè discutienda, in Scholis Medicorum, die jovis duodecimâ  
Februarii anno M. DCC. L.*

M. CLAUDIO-CAROLO DE JEAN, Scholarum  
Professore, Doctore Medico, Præside.

*An inter apostemata, pauca ferro sunt aperienda?*

I.



OMINEM, dum vivit, non solum intus cruciari mille morbis,  
sed & extrâ, affectibus numero penè infinitis deturpari, nil mi-  
reris. Tumoribus omnis generis, omnis speciei, miserè obnoxia  
humana cutis. Pro diversâ affluente materiâ, aut excretâ aut pro-  
pulsâ, diversa tumorum aut indoles aut natura. Ubicumquè (vi  
morbi) naturalem cutis superficiem attollere cœpit appulsus humor  
quicumque; tunc moles ista, tumor audit. Singulos sanguinis humores, seor-



sim modò, modò conjunctim sub cute latitantes incuneari, congeri, imò vasis ruptis inibi expandi, putrefieri, nec novum nec infrequens. Humor quisque, seu devius à suâ sede solummodò, seu simul à suâ naturali crâsi degener, sub aliquâ cutis parte gliscens, concrefcensvè, tubere se manifestum facit. Propriâ quodammodo formâ, tumor quivis venit conspiciendus. Ab humoris vicio aut situ, plerumquè nomen habet. Tumor omnis, aut sui fert resolutionem, si modò per vasa iter de novo petere humori datum sit; aut ablationem sui exposcit, si peregrinus humor resorberi à vasis, & sanguinis fluento denuò misceri nequeat. In priore casu resolventibus medicamentis, externis interioribuscve, aut naturâ solâ, curatio perficitur: in altero, arte opus est; hæc ars, Chirurgica est. At ne credas Chirurgiam, igne & ferro sempèr torquere membra. Quod naturam turbat vexatque, procùl amovere, Chirurgi opus est. Quod natura sola, tutò & per se sanare potest, illi relinquendum; & si quo indiget adjumento, est in supellectile Pharmaceuticâ, unde adjuvetur.

## I I.

**A**πὸς ημῶν tumorem dicito rotundum, tactui, ipsisque oculis obvium. Calorem habet individuum comitem; colorem quoquè plùs minùs in ambitu rubeum, prout cuti vicinior aut ab ipsâ remotior, cuius attendenti exhibet. Ardore continuo, & in dies magis ac magis crescente, ægrum cruciat non sine dolore nunc pungente, nunc lancinante. Urget, invalescitque dolor ille ad maturationis usque tempora; eâ peractâ, misceant omnia, tactuque mollius percipitur apostema, sensimque & in dies pleniori mollitie, tangenti se offert contractandum. Tunc Chirurgi ad opus se accingunt, ferrum festinantèr arripiunt; Sed heu, quàm infausto sapè eventu! rationem quæris? naturæ parùm auscultatur, ad ejus leges parùm attenditur, nec satis curæ est perpendere, quo ritu omnia sua munia obeat, quibus impedimentis in agendo interpelletur, quâ virtute, omne noxium corrigere, à partibus nobilioribus in partes ignobiliores rejicere aut prorsùs foràs eliminare satagat; quàm multiplici viâ se liberet ab iis quæ suam œconomiam turbare valent, quâ sagacitate fracta erigatur. Ea succos in apostema nocivos abigit, congestos digerit, concoquit, maturat. Vulnerum quin & eadem una medicatrix. Quid igitur Chirurgus in utrorumque curatione? Naturæ minister; ferendo nempe subsidium nutui ejus & voto, ministrum se præbet ad ipsius mentem; nihil agendo ubi nihil agendum; secando ubi secandum innuit; amovendo ferrum & instrumenti genus omne, statim ac & quotiescumque vetat admovendum.

## I I I.

**I**N plerisque igitur apostematum, natura per se sola, totum opus perficit; digerit materiam, eidem exitum præbet, sordes detergit, farcosum promovet, cicatricem obducit. Refragaris? vade ad Plebeios, vel quos res angusta domi, vel quos ferramentorum pavor, ab omnibus præfidiis arcet; en me, inquiet, eorum unusquisque, sanatum vides absque Chirurgiæ ope. Nec tibi moveat admirationem talis sanatio; ferrum, naturæ inimicum: in apostematibus expurgandis, detergendis, & ad cicatricem perducendis moram facit & impedimentum. Abscessus omnis, discussionis spe omni elapsâ, solam maturationem tractanti relinquit promovendam, suppurationem vocant. Colliquatio quædam est hæc suppuratio, seu partis rubræ sanguinis in colorem album immutatio, commixta priùs (digestione quâdam) cum seroso-lymphaticâ sanguinis parte; laudabilis erit & salutifera, si materiâ hinc enata, albam se offerat & æqualem.

absque fetore. Hanc promove citius, urge pro viribus; periculum enim in morâ. Cuti quò vicinior erit puris copia, eò felicior exitus futurus; imò, ut in partem veniat ipsa cutis, enixè labora; cutis præcipuè pars magis declivis: ea sola putrefacta, materiæ purulentæ exitum parabit. Nec te moveat apertura parciore; seu à naturâ solâ, seu maturantium ope facta. Integram purulentam materiem foras amandabit sola loci declivitas. Salvâ reliquâ cutis parte apostema subtegente, abscessus interiora tuta sunt ab aëris injuriâ. Vulneri omni, insensibilissimus aër; fermentationis omnis extraneæ, corruptionis putredinisque parens ille. Apostemati circumstrata cutis, emplastrum naturæ amicum. Deterfio puris, naturæ opus est. Carnis nova generatio ex solo naturæ censu. Cicatricem, ejecto pure quis format nisi natura? Quis pulchriorem perfecit unquam? Ne igitur, ferri ope, in apostematis omnibus indiscriminatim, patentiorem viam aëri facias, nec erubescas agri bonis rebus magis consulere, quam legi heu nimium receptæ, jam dudum antiquandæ.

## I V.

**L**ANCEOLA, instrumentum anceps, à quo vita aut mors; prudentis ideo Medici regenda consilio, periti tractanda manu Chirurgi. Tumorem omnem perpende accleritus. Situm, naturam, characterem explora apostematis, & causam; nec satis est, ætatem, sexum, temperamentum habe diligenter perspecta; nec-non totius massæ sanguinæ crasim præsentem, imminentemve. Ex eâ probè cognitâ, quid agendum sit, quid non, intelliges. Tunc omnibus indiscriminatim apostematis ferrum admove re religio erit. Faciei, collo, temporibus & mammis parce; at imprimis fave sexui, & infantili ætati aut juvenili; sexui, venustatis gratiâ; ætati teneræ, ob succorum eucrasiam; horum succi, rariùs degeneres à suâ crasi, solâ sapiùs peccant luxuriâ; suppurationem patiuntur dulcem, simplicem, innocuam, cujus exitum natura parat sola, favente fibrarum mollicie. Exitus puri semel paratus, etsi parciore, sanatio est. Exitum, si tardior, accelera obtegendo partem rupturæ propiorem. Obtege humidis, qualia sunt succi herbacei, aut soli aut fermento mixti, aut melle, aut omnibus simul; non spernenda liliorum bulbosa radix & capæ coctæ priùs, aut inter cineres, aut in aquâ ebulliente, cum micâ fecalini panis commixtæ & applicatæ; his humescunt fibræ cutis foris ut intus, citiusque putrescunt, solutioni sic promptiores evadunt. Non absimili virtute polleunt emplastra plurima aut unguenta, ut emplastrum divinum, aut diachylon verum cum gummi, emplastrum de meliloto, aliaque ejus energię quàm plurima. Detersionem si fortè requirit sordium illuvies, tunc hordei decoctio tantilla, omne ferat fermè punctum, iteratis vicibus per fistulam injecta. Temperamento sanguineis promptior faciliorque suppuratio. Ætas provectior aut senilior, durior, stricteoremque præ se fert fibrarum texturam, solutu difficiliorem. Emollientia jam enarrata scopum pertingunt oleosis commixta & diutius usurpata. Hæc methodo naturæ amicâ, plerisque apostematum modelam asseres, ferrique incommoda vitabis.

## V.

**E**RGO, inquires, nullum apostema, sectione curandum? absit. Nonnunquam sectio salutaris, imò necessaria. At faciliùs, addes, sectione factâ tractaretur, sanaretur tutius. Utrumque negat ratio. Experientia refragatur. Sectio, multa secum invehit mala; secantur pretiosa plurima cujuscumque generis vasa, aliàs non rumpenda; hinc succorum copiosior expansio pedissequa; hinc suppuratio abundantior futura. Grave aliud secum im-

4

portat incommodum sectio facta apostematis; suppurantium formidanda series presso pede sequitur; hæc fundunt, liquant plus æquo; imò, pervertunt frequentius ipsam puris laudabilis texturam naturalem; è dulci acrem, ex insipidâ acidam fecit, aut alio quovis vitio contaminavit non rarò suppurantium dira libido, aut ordo perversus. In farcosi promovendâ, errores quàmplurimi; alii, gradu præcipiti nimis, in eam ruunt, dùm nimîâ morâ eidem invigilant alii. Nonnunquàm farcosis fit inæqualis; fungosa sæpè & flaccida; nec firma satis rubraque & optimè carnea. En ubi vocantur in auxilium caustica; en lapidis *infernalis* triumphus: at quàm fallax eorum usus? quàm benè tunc cum ægro ageretur si ea intùs, plus damni, quàm doloris forinsecus non asserent? Absit tamèn ut interdicator sectio in apostemate profundius sito, ubi cutis nec affici nec putrescieri poterit simul cum apostemate; & ubi metus erit ne serpat materia subrà contenta, modò sinuosum ulcus, fistulosum modò aut cancrum formatura. Secare licet in omni tumore apostematode maligno; in carbunculo aut anthrace, si urgeat præsentia periculi. Seca quodcumque apostema sphacelo aut gangrænâ stipatum, ni citò utrumque detur discutere efficaci aliquo pharmaco & tuto. In omnium autem apostematum amplâ & quotidianâ multitudine quàm pauca hujusce naturæ se offerant curanda, praxis evincit.

*Ergò inter apostemata, pauca ferro sunt aperienda.*

## DOMINI DOCTORES DISPUTATURI.

<i>M. Petrus Arcelin.</i>	<i>M. Joannes le Thieullier, Chirurgia Gallico idio- mate Professor designa- tus.</i>	<i>M. Franciscus Pousse.</i>
<i>M. Petrus Chevalier.</i>	<i>M. Jacobus Verdelhan Desinoles, Scholarum Professor designatus.</i>	<i>M. Thomas - Bernardus Bertrand.</i>
<i>M. Franciscus Bernard.</i>	<i>M. Claudius Person.</i>	<i>M. Camillus Falconet; Salubris Consilii Regii Socius, &amp; Regiâ Scien- tiarum &amp; Numismatum Academiâ.</i>

Proponebat Parisiis LUDOVICUS-JOANNES-BAPTISTA COSNIER;  
Parisiinus, Saluberrimæ Facultatis Medicinæ Parisiensis Baccalaureus,  
A. R. S. H. 1750, à sexta ad meridiem.

---

Typis QUILLAU, Universitatis & Facultatis Medicinæ Typographi, 1750.